

Na osnovu člana 4.8. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02 i 13/03), člana 46. Zakona o osnivanju kompanije za prijenos električne energije u Bosni i Hercegovini ("Službeni glasnik BiH", br. 35/04 i 13/03), čl. 7. i 18. Pravilnika o tarifnom postupku ("Službeni glasnik BiH", broj 44/05) i čl. 3. i 8. Odluke o načinu utvrđivanja privremenih tarifa za prijenos električne energije i rad Nezavisnog operatora sistema ("Službeni glasnik BiH", broj 44/05), Državna regulatorna komisija za električnu energiju, na sjednici održanoj 21. marta 2006. godine, donijela je

## ODLUKU

1. Kompaniji za prijenos električne energije u BiH ("Elektroprijenos Bosne i Hercegovine" a.d. Banja Luka) za 2006. godinu određuje se potrební prihod na godišnjem nivou u iznosu od 125.443.181 KM i utvrđuje privremena tarifa za usluge prijenosa električne energije kako slijedi:
  - 0,980 pf/kWh za kupce u Bosni i Hercegovini koji preuzimaju električnu energiju sa mreže prijenosa,
  - 0,389 pf/kWh za deklarirani uvoz električne energije iz zemalja koje u okviru Mehanizma kompenzacije između operatora prijenosnog sistema (ITC mehanizam) imaju status tzv. *perimetar* zemlje,
  - 0,578 pf/kWh za deklarirani izvoz električne energije.
2. Nezavisnom operatoru sistema u Bosni i Hercegovini se nalaže da po isteku svakog kalendarskog mjeseca sačini izvještaj o veličinama deklariranog izvoza sa pripadajućim vrijednostima za svakog vlasnika licence u elektroenergetskom sektoru, na osnovu kojeg će Kompanija za prijenos električne energije u BiH fakturisati usluge prema tarifi iz alineje 3. prethodne tačke.
3. Kompaniji za prijenos električne energije u BiH se nalaže da do 31. oktobra 2006. godine osigura ugradnju nedostajućih mjernih uređaja (snaga, aktivna i reaktivna energija) u svim tačkama razgraničenja između prijenosne i distributivne mreže i u svim tačkama razgraničenja između prijenosne mreže i proizvodnih jedinica.

Kompanija je dužna da po isteku svakog kalendarskog mjeseca sačini izvještaj o iznosima opterećenja, aktivne i reaktivne energije koje su izmjerene u svim tačkama razgraničenja između prijenosne i distributivne mreže, kao i o iznosima aktivne i reaktivne energije koje su isporučene na mrežu prijenosa u svim tačkama razgraničenja između prijenosne mreže i proizvodnih jedinica.
4. Ova odluka stupa na snagu danom donošenja, a primjenjuje se od 1. aprila 2006. godine.

Odluka se objavljuje u "Službenom glasniku BiH" i službenim glasilima entiteta i Brčko Distrikta Bosne i Hercegovine.

### Obrazloženje

Odlukom Državne regulatorne komisije za električnu energiju (u daljem tekstu; DERK), broj: 04-28-248-29/05 od 31. januara 2006. godine, Kompaniji za prijenos električne energije u BiH ("Elektroprijenos Bosne i Hercegovine" a.d. Banja Luka) za 2006. godinu određen je potrební prihod na godišnjem nivou u iznosu od 123.610.120 KM i utvrđena početna

privremena tarifa za usluge prijenosa električne energije u iznosu od 1,087 pf/kWh, uz pridržaj prava DERK-a da izvrši podešavanje tarife ako to ocjeni potrebnim.

Diferenciranjem privremene tarife na više kategorija, domaćim kupcima a posebno velikim industrijskim kupcima, osigurava se povoljnija pozicija na tržištu u pogledu snabdjevenosti količinama električne energije potrebnim za njihov nesmetan rad. Odluka podstiče davanje prioriteta snabdjevanju domaćih potrošača od strane svih elektroenergetskih subjekata u Bosni i Hercegovini čime afirmativno doprinosi kreiranju i razvoju jedinstvenog tržišta električne energije u BiH. Istovremeno, podešavanje tarifa na način opisan dispozitivom ove odluke predstavlja i jednu od mjera usmjerenu na izbjegavanje značajnijeg povećanja cijena električne energije za krajnje kupce u BiH koje bi troškovni princip u formiranju tarifa za pružene usluge, u početnom periodu primjene mogao izazvati.

Kako bi se obezbjedio pravedniji pristup u tarifiranju, odnosno mogao preciznije alocirati odgovarajući trošak koji svaki kupac uzrokuje na prijenosnoj mreži, DERK namjerava u narednom tarifnom postupku utvrditi dvodjelnu tarifu koja će sadržavati komponente energije i snage za čiju će primjenu biti neophodno pored mjerenja energije uvesti i mjerenje opterećenja.

S obzirom na smanjenje prihoda po osnovu primjene ITC mehanizma sa procijenjenih 8 miliona na 6.166.939 KM, za razliku od 1.833.061 KM potrebni prihod Kompanije za prijenos u BiH utvrđen prethodnom odlukom DERK-a od 31. januara 2006. godine bilo je neophodno uvećati do iznosa od 125.443.181 KM.

U skladu sa članom 9.2 *Zakona o prijenosu, regulatoru i operatoru sistema električne energije u Bosni i Hercegovini*, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 04-28-248-37/05  
21. marta 2006. godine  
Tuzla

Predsjedavajući Komisije  
Željko Topić